

Deo optimo max. uni & trino, Virgini Deiparæ, & sancto Luca orthodoxorum Medicorum Patrono.

## Q U Æ S T I O M E D I C A .

Cardinalitiis disputationibus manè discutienda in Scholis Medicorum, die Jovis secundâ Martii.

M. FRANCISCO MAILLARD, Doctore Medico, Præside.

*An noxia Febricitantibus Ova ?*

**U**T ægri non quolibet medicamento curantur; sic non quovis alimento nutriuntur. Quod uni prodest affectui, nocet alteri. Aliqui levibus, vehementibus alii, nonnulli mediocribus pharmacis indigent. Hic calidam, ille frigidam exoptulat escam. Alios juvat, alios lædit valentis materiæ cibus. Tot proprietatum radix eadem quæ morborum; varia nempe succorum indoles, qui semel viciati similibus exasperantur, castigantur contrariis. Hinc Febricitantibus non omnia conveniunt. Quæ motos componunt humores, quæ comprimunt alienum calorem, ea sunt illis salutaria; quæ foveant insolentem sanguinis effervescentiam, quæ cæteros augment incendii febrilis apparatus, ea noxia sunt & abdicanda.

**V**EHEMENS & inordinatus sanguinis motus, febris est. Pereunt hoc motu caloris blanditiæ; perit mollities succorum; crescit in corde peregrinus ignis mali semina latè dispersurus. Hinc quot partes, tot intemperies; quot liquores, tot effervescentiæ. Fervoris impetu quoquò versum dissilit quidquid tenuius, quidquid acrius est in humoribus. Id si cutim feriat, rigor inde concitatur; si thoracem, tussis; si cerebrum, capitis dolor. His accedunt ob incandescentiam sanguinis pulsus celer, spiritus difficilis; ob macerata calore viscera linguæ siccitas, multa sitis, pertinax vigilia.

**F**EBRILIS hæc tempestas assidua est, aut interpolata: certis illa temporibus exacerbatur, vel eodem tenore furit; silet hæc aliquandiu modo tertiâ, modo quartâ luce recursura. Vitiosus sanguis utriusque reus est: is à chylo vitiatur sæpius, ut chylus à cibo: si videlicet alimentum fuerit ætiosum, si nimis sulphureum, consimilis futurus est chylus: hic in fervore positus tumultuosè movet & incendit cruorem, cui ferè totus admiscetur. Proinde, Febricitantes offendit quidquid ebullientibus succis addit novum mortis incitamentum: id mali genus accersunt Ova quovis modo parata.

**I**GNEUS est illis calor ab origine. Præservidæ sunt animantes undè producuntur; ætiosissima materies ex quâ constantur. In Ovi candido multum salis est volatilis; in luteo multum sulphuris. Ut tenues illæ particule molem farinæ cum quâ confunduntur Ova, subigunt, attollunt; ita massam sanguinis cui permiscuntur, agitant, distendunt. Inde sanguis vehementer incitatus, Febriles accendit aut alit igniculos. Demum, si turgeant Ova succo nimium nutriente; succus hic officit Febricitantibus, quos leve juvat alimentum: si fervidis ingesta visceribus in bilem faceant; hæc quoque bilis fomes est peregrini caloris: si retorrearantur & indurescant ab æstu ventriculi, velut ab igne focario; statim vitellus flammam concipit, & fit oleum mox exarsuræ Febris irritamentum.

**I**GITUR dum Febris adurit ægrotantes, iis pessima sunt Ova; cibum suggerunt nimis robustum, nimis æstuantem. Habes in Ovis undè conciteris ad libidinem; sed hæc libido quasi Febris est. Est in Ovis, & quod uberem provocat sudorem, & quod externos digerit tumores; sed hoc, qualecumque sit, insolenter etiam commovet sanguinem, renovatque flammæ. Aded multis Ova constant ex partibus mole minimis, motu valentissimis: si lenta, si crassior aliundè sit in Ovis materia, suos illa sales continet; suo fervet intus sulphure.

*Ergo noxia Febricitantibus Ova.*

Proponcbat Lutetiæ JOANNES-FRANCISCUS FOY-VAILLANT, Bellovacensis, Baccalaureus Medicus. A. R. S. H. 1690.

(1735)  
Lutet. 1435

